



REPUBLIKA E SHQIPËRISË

MINISTRIA E DREJTËSISË

MINISTRI

Nr. 1028/7 Prot.

Tiranë, më 01 / 04 / 2022

URDHËR

Nr. 122 datë 01 / 04 2022

PËR

PEZULLIMIN NGA DETYRA TË NOTERES REZARTA KOÇI, PËR GJITHË PERIUDHËN E KOHËZGJATJES SË MASËS SË SIGURIMIT “ARREST ME BURG”

Në mbështetje të nenit 102, pika 4 të Kushtetutës, të nenit 7, pika 1, të ligjit nr. 8678, datë 14.05.2001 “Për organizimin dhe funksionimin e Ministrisë së Drejtësisë”, i ndryshuar, të nenit 56, shkronja “a” të Ligjit nr. 110/2018, datë 20.12.2018 “Për noterinë”,

KONSTATOJ:

Ministria e Drejtësisë në kuadër të ushtrimit të mbikëqyrjes së veprimtarisë noteriale të noteres Rezarta Koçi, me Urdhërin nr. 351, datë 26.05.2021 ka vendosur heqjen e licencës së ushtrimit të profesionit.

Ky akt është ankimuar nga noterja në Gjykatën Administrative të Shkallës së Parë Tiranë e cila ka vendosur me Vendimin nr. 2892 (2955), datë 21.10.2021, sa vijon:

1. Shfuqizimin e Urdhrit nr. 3, datë 06.05.2021, të Bordit Dsisiplinor pranë Dhomës Kombëtare të Noterisë për marrjen e masës disiplinore “Heqjen përfundimtare të licencës për ushtrimin e profesionit të noterit, për noteren Rezarta Koçi”.
2. “Shfuqizimin e Urdhërit nr.351, datë 26.05.2021 “Për heqjen e licencës së ushtrimit të profesionit të noterit, noteres Rezarta Koçi”;
3. “Dhënien e vendimit me ekzekutim të përkohshme”, duke i kthyer paditëses, noteres Rezarta Koçi, lejen e ushtrimit të veprimtarisë noteriale.

Në datë 04.02.2022 nga informacionet e përfituara nga mediat audiovizive lidhur me shtetasen Rezarta Koçi, Ministria e Drejtësisë ka evidentuar se noterja Rezarta Koçi ka qenë subjekt në hetim nga Prokuroria Pranë Gjykatës së Shkallës së Parë Tiranë, arrestuar nga Policia e Shtetit po në këtë datë për veprat penale “Shpërdorim detyre” dhe “Vjedhja e kryer duke shpërdoruar detyrën”.

Lidhur me informacionet e përfituara nga media, në referim të parashikimeve të pikës 1, të nenit 30 të Ligjit nr. 110/2018 “Për noterinë”, sanksionohet se “1. Ministri i Drejtësisë fillon hetimin kryesisht, bazuar në të dhëna thelbësore dhe mbi fakte që rezultojnë nga burime të besueshme, mbi bazën e të cilave lind dyshimi i arsyeshëm se mund të jetë kryer një shkelje. Informacionet që përftohen nga media ose nga ankues anonimë mund të shërbejnë si indicie për të filluar një hetim kryesisht.”

Në zbatim të pikës 1 në raport me parashikimet e fjalisë së dytë, pika 3 e nenit 32 të Ligjit nr. 110/2018 “Për noterinë”, i ndryshuar, për rastet kur ndaj noterit është duke u zhvilluar hetim penal ose një proces gjyqësor penal, administrativ ose civil, sanksionohet se “... Gjykata, prokuroria ose institucione të tjera i dërgojnë Ministrin të Drejtësisë pa vonesë çdo vendim që merret gjatë hetimit dhe procedimit përkatës.”

Nga ana tjetër, në zbatim të shkronjës a) të nenit 56, të ligjit nr. 110/2018 “Për noterinë”, parashikohet se “Noteri ose zëvendësnoteri pezullohet përkohësisht nga detyra me vendim të Bordit Disiplinor, kur: a) ndaj tij caktohet masa e sigurimit personal “arrest në burg” ose “arrest në shtëpi” për kryerjen e një vepre penale, përgjatë gjithë periudhës së arrestit në burg ose arrestit në shtëpi;”.

Lidhur me fillimin e procedurës së pezullimit dhe njoftimet për Bordin Disiplinor, në shkronjën b) të nenit 57 dhe pikën 1 të nenit 58 të ligjit nr. 110/2018 “Për noterinë”, sanksionohet se:

Pezullimi nga detyra i noterit ose zëvendësnoterit, sipas nenit 56, të këtij ligji, mund të vendoset nga Bordi Disiplinor:

a) me nismën e vet;

b) me kërkesë të Ministrin të Drejtësisë ose mbi bazën e njoftimit, sipas parashikimeve të nenit 58 të këtij ligji.

1. Titullari i institucionit përgjegjës informon Bordin Disiplinor menjëherë me marrjen dijeni të fakteve të renditura në nenin 56 të këtij ligji.

Pas verifikimeve të kryera nga Bordi Disiplinor i Dhomës Kombëtare të Noterisë, me kërkesë për informacion me shkresë nr. 2/29 prot., datë 11.02.2022, drejtuar Gjykatës së Rrethit Gjyqësor Tiranë, është konfirmuar zyrtarisht nga kjo e fundit me shkresën nr. 464/1 prot., datë 28.02.2022, se për noteren Rezarta Besnik Koçi me Vendimin nr. 237 akti, datë 03.02.2022 është vendosur caktimi i masës së sigurimit personal “arrest me burg”, si person në hetim për veprën penale “Vjedhje duke shpërdoruar detyrën” e parashikuar nga neni 135 i Kodit Penal si dhe Vendimi nr. 237/1 Akti, datë 05.02.2022.

Sa më lart, në kushtet kur me shkresë nr. 1028/1 prot., datë 17.02.2022, Ministria e Drejtësisë ka informuar Bordin Disiplinor të Dhomës Kombëtare të Noterisë mbi faktet e relatuar në mediat

audiovizive për vendimarrje sipas parashikimeve të nenit 56 e vijues të ligjit nr. 110/2018 “Për noterinë”, i ndryshuar, si dhe faktit që pas verifikimeve me Gjykatën e Rrethit Gjyqësor Tiranë, për noteren Rezarta Besnik Koçi me Vendimin nr. 237 akti, datë 03.02.2022 është vendosur caktimi i masës së sigurimit personal “arrest me burg” si person në hetim për veprën penale “Vjedhje duke shpërdoruar detyrën” e parashikuar nga neni 135 i Kodit Penal, nga Bordi Disiplinor me Vendimin nr. 1, datë 03.03.2022, është vendosur “Pezullimi nga detyra të noteres Rezarta Besnik Koçi, Notere e Dhomës Kombëtare e Noterisë Tiranë, për gjithë periudhën e kohëzgjatjes së masës së sigurimit “Arrest në burg”, në bazë të nenit 56, shronja “a” të Ligjit nr. 110/2018, datë 20.12.2018 “Për noterinë”.

PËR KËTO ARSYE:

Në mbështetje të nenit 102, pika 4 të Kushtetutës, të nenit 7, pika 1, të ligjit nr. 8678, datë 14.05.2001 “Për organizimin dhe funksionimin e Ministrisë së Drejtësisë”, i ndryshuar, të pikës “a”, të nenit 56 e vijues, të Ligjit nr. 110/2018 “Për noterinë”,

URDHËROJ:

1. Pezullimin nga detyra të noteres Rezarta Besnik Koçi, Notere e Dhomës Kombëtare e Noterisë Tiranë, për gjithë periudhën e kohëzgjatjes së masës së sigurimit “Arrest me burg”.
2. Caktimin e noteres Blerta Kaceli për administrimin e arkivës noteriale, deri në përfundim të afatit të pezullimit të Licencës sipas parashikimeve në pikën 1 të këtij urdhëri.
3. Ngritjen e Komisionit të Dorëzimit të Arkivit të përbërë nga anëtarët e mëposhtëm:
 - a) Z. Alfred Pupli dhe Erisa Sulçe, Specialistë;
 - b) Noteri Fatmir Lacej dhe Sajmir Shatku nga Dega Vendore e Noterisë, Tiranë.
4. Administrimin e vulave respektive në sektorin arkiv-protokoll pranë Ministrisë së Drejtësisë, vulës së thatë dhe vulës së njomë, të noteres Rezarta Koçi, deri në përfundim të afatit të pezullimit të Licencës sipas parashikimeve në pikën 1 të këtij urdhëri.
5. Të njoftohen menjëherë me përmbajtjen e këtij Urdhri institucionet e linjës, Dhoma Kombëtare e Noterisë, Gjykatat e Shkallës së Parë dhe Apelit, Gjykata e Lartë, Gjykata Kushtetuese, Prokuroria e Përgjithshme dhe institucionet në varësi të Ministrisë së Drejtësisë.
6. Gjatë marrjes në dorëzim të arkivit, Komisioni i Dorëzimit të Arkivit të verifikojë përputhshmërinë e të gjithë dokumentacionit dhe akteve noteriale që përmban arkiva me

veprimet e reflektuara në regjistrat noterialë, si dhe të evidentojë çdo mungesë dhe çdo dëmtim të dokumenteve arkivorë, nëse ka të tilla.

7. Arkivi noterial të merret në dorëzim me procesverbal në bashkëpunim me Degën Vendore të Noterisë Tiranë dhe Dhomën Kombëtare të Noterisë.
8. Regjistrimin e këtij Urdhri në Regjistrin e Noterëve në Ministrinë e Drejtësisë dhe Dhomës Kombëtare të Noterisë.
9. Ngarkohet Drejtoria e Përgjithshme Rregullatore e Çështjeve të Drejtësisë në Ministrinë e Drejtësisë dhe Dhoma Kombëtare e Noterisë, për marrjen e masave të nevojshme për zbatimin dhe njoftimin e këtij Urdhri.

10. Ky Urdhër publikohet në faqen zyrtare të Ministrisë së Drejtësisë

Ky urdhër hyn në fuqi menjëherë.

MINISTRI

Ulsi Manja

